

摘藻堂四庫全書薈要

集部

欽定四庫全書薈要

集部

空同集卷一至三



欽定四庫全書

空同集目錄

卷一

賦

卷二

賦

卷三

賦



卷四

風雅什

卷五

樂府

卷六

樂府

卷七

樂府

卷八

樂府

卷九

五言古

卷十

五言古

卷十一

五言古

卷十二

五言古

卷十三

五言古

卷十四

五言古

卷十五

五言古

卷十六

五言古

卷十七

效雜體

卷十八

七言古

卷十九

七言古

卷二十

七言古

卷二十一

七言古

卷二十二

七言古

卷二十三

五言律

卷二十四

五言律

卷二十五

五言律

卷二十六

五言律

卷二十七

五言律

卷二十八

五言律

排律

卷二十九

七言律

卷三十

七言律

卷三十一

七言律

卷三十二

七言律

卷三十三

七言律

卷三十四

五言絕句

卷三十五

七言絕句

卷三十六

七言絕句

卷三十七

七言絕句

七言排律

六言

雜言

卷三十八

族譜

卷三十九

上書

卷四十

狀疏

卷四十一

碑文

卷四十二

碑文

卷四十三

碑文

卷四十四

志銘

卷四十五

志銘

卷四十六

志銘

卷四十七

志銘

卷四十八

記

卷四十九

記

卷五十

序

卷五十一

序

卷五十二

序

卷五十三

序

卷五十四

序

卷五十五

序

卷五十六

序

卷五十七

序

卷五十八

傳

卷五十九

雜文

卷六十

雜文

卷六十一

雜文

卷六十二

書

卷六十三

書

卷六十四

祭文

卷六十五

外篇

卷六十六

外篇

臣等謹案空同集六十六卷明李夢陽撰夢陽字獻吉慶陽人弘治癸丑進士官至江西提學副使事迹具明史文苑傳夢陽為戶部郎中時挫壽寧侯張鶴齡又助韓文草疏劾劉瑾邁禍幾危氣節本震動一世又倡言復古使天下毋讀唐以後書持論甚高足以竦

當代之耳目故學者翕然從之文體一變厥
後摹擬剽賊日就窳白論者追原本始歸獄
夢陽其受詒厲亦最深考明自洪武以來運
當開國多昌明博大之音成化以後安享太
平多臺閣雍容之作愈久愈敝陳陳相因遂
至嘽緩冗沓千篇一律夢陽振起痿痺使天
下復知有古書不可謂之無功而盛氣矜心
矯枉過正周亮工書影載其黃河水繞漢宮

牆一詩以落句有郭汾陽字涉用唐事恐貽

口實遂刪其稿不入集中其堅立門戶至於

如是同時若何景明薛蕙皆夢陽唱和之人

景明論詩諸書既斷斷徃復蕙亦有俊逸終

憐何大復粗豪不解李空同句則氣類之中

已有異議不待後來之排擊矣平心而論其

詩材力富健實足以籠罩一時而古體必漢

魏近體必盛唐句擬字摹食古不化亦徃徃

有之所謂武庫之兵利鈍雜陳者也其文則
故作聱牙以艱深文其淺易明人與其詩並
重未免怵於盛名今並錄而存之俾瑕瑜不
掩且以著風會轉變之由與門戶紛競之始
焉乾隆四十三年七月恭校上

總纂官

臣紀昀

臣陸錫熊

臣孫士毅

總校官

臣

陸費

墀

欽定四庫全書薈要卷一萬六千八百九十二

集部

空同集卷一

明 李夢陽 撰

賦一

疑賦

下乾上坤高卑易矣星辰在下江河逆矣天喬喬天雉鳴
求牡矣魚游于陸冠苴履矣嗚呼噫嘻當晝而夜宵中日
出我黑彼白婦鬚男裼鉏刀何鈇湛盧何鈍丈則謂短謂

長者寸鳳鳴翩翩羣唾衆愆鵠鵠胡德見之慕焉嗚呼噫
嘻貞瑩內精讒嫉孔彰乖滑渙忍名崇智成軟詭歆歆馳
騁爽達殲良媚勢光爛門閥彼曰昧昧人則攸知上帝板
板鬼神邈而昔之多士猶或畏疑今之多士覲肆罔懷嗚
呼噫嘻民殊者形厥心則一威擠利啗曰伊我粟血流于
庭酣酒歸室友朋胥嬉同聲德色弇彼罔識巧我攸極昔
之執衡視權與星今之執衡惟我重輕古道坦坦今眩東
西指晨謂暮目鸞為鷄鄰牛茹虎冀虎德予厲莫察階倒

靡究所嗚呼噫嘻盜跖橫行回憲則貧上官尊榮原隕厥
身直何以仇佞何以親或何以顛操何以振飛何以屈櫓
何以伸西子何惡嫫母何姝乘黃瘠弱御者駘駘舍彼靈
明溺任胡塗皎皎者忌憐彼濁污水清奚無魚而泥淖以
成良畬先生莫所自解誦曰握粟出卜其何能穀於是出
造巫咸叩馬巫咸曰胡梯鵲突而與世汨受福揭揭漁者
一旦獲尋丈之魚見之者猶捩頸流涎思刼之而憾不漁
者而况懷千金之寶抱徑寸之珠吾誠不能筮以決子之疑

鈍賦

鈍者何傷時之銛也亦自快也

余竊悲機巧之競進兮性靈利而激昂衆倜儻而鑽刺
兮務捷徑以求成勢犬牙苟相軋兮白刃起而相仇戈
戟攢於心肺兮蹈檻穽而靡憂汨余生之頑鈍兮年逾
壯而無能強砥礪而求合兮路亡羊而多岐退斂掩而
脩吾初服兮韜余劍之陸離拂靈鍔之齟齬兮吾什襲
而猶恐露之喟時俗之反覆兮常寶偽而棄真斥莫邪

使不御兮挈鉞刀而自珍吾縱有湛盧與龍泉兮反孤
立而危懼按明月之玉環兮塵星斗使不露覽往古誰
不然兮吾又何怨乎今之遭余常怪范蠡之用鉞兮末
見幾而逃彼種與胥豈乏利刃兮竟為主之仇讎故木
以直見伐兮樗以屈曲保全故銳者先剝兮吾蓋幸毛
遂之脫身鬱侘傺余拂抑兮退且焉礪吾初質索白茅
而構菴兮斲桂杉而為室悶蹢躅以潛處兮情蹇產而
畫一闐跼躅以後時兮寂蒙滕而藏密余以往哲為治

兮以隱子為模鎔禮樂以為鈇兮淬仁義而內娛進既
匪我願兮又何必昭此鋒也愴徜徉以往來兮聊秣吾
之駿駢策驚駘而追騏驥兮余故知路之遼遠按六轡
而遊康莊兮亦何必逞羊腸與九坂舍余駟於丘之旁
兮又捐刃乎水裔準閉戶而削迹兮效完身而遠害惟
山路之巉嶮兮叢篁鬱而蔽天物過盛而易實兮勢阨
危而必顛吾寧楞騰屋寂蒙詬笑兮不願為文錦之犧
牛寧與蹇驢齊軌埋沒于塵土兮終不與凡馬而競先

思賦

有子不及見其成立為子生無以養死無以葬仕
也無以褒斯二者天下之至悲也死者已生者思
兀然黯然於乎駱子胡以塞汝悲於是為駱子作
思賦賦曰

慨予生之眇眇兮塊獨處此遐域誦往昔以自憐兮淚
交下而橫臆登峻極以顧望兮慨江路之漫漫思井隴
之萎絕兮願矯舉而無翰山岵岵以蔽目兮浮雲又互

而四馳詔鳴鳥以詒訊兮歟高騫而過之託先人之餘
蔭兮踵高躅於英哲勉策名以副實兮懼前脩為之半
輟入文裊以華屋兮出結駟之翩翩慟夜臺之既局兮
杳冥冥而重泉攬疆土之殊異兮睇江鄉之墓阡米予
莫之負兮木兮風而夕厲悵怛以不寐兮標拊膺而
歔歔哀故山之遼遼兮湖汙汙而海波龍荆榛之弗治
兮枯荑積而寒莎霜露既披此梧楸兮迺又申之以飈
飈猿夜鳴以慘心兮鴻鴈南而氷雪米雪予既弗堪兮

豺狼又怒而當路然萋菲之易眩兮
寥隱憂而誰訴恫
惛惛以中結兮
氣氤氲而內煎
耿絲聯而靡絕
兮鬱於
邑而若牽
怒梟牢而若饑
兮若皇皇求而未得
食俵俵
而罔甘
兮寢輾轉而反側
步蹢躅而有望
兮坐默默而
自語
僂僂而有聞
兮肅容聲之接
予亂曰
綏我思成
神之利降
爾遐福
天之畀孝子
不匱賢之嗣

述征賦

正德四年夏五月北行作

仲夏赫炎兮草木畢揭戰縲赴徵兮夜發梁國抑情順
志兮彊食自解亂流渡河兮忽焉而寐所以懣恨揮霍
兮中情茆而內傷明星散而交加兮翩冥冥吾以行覽
衆芳而橫涕兮莽皇皇莫知所投曷瞰杲杲方上進兮
雲披離而蔽之飄風盛而曾波兮湖水擊而震盪慨川
廣而難越兮朝余翱翔乎河上既涉衛以奔騫兮又逾
淇而渡漳去故鄉以就遠兮霑余襟兮浪浪山峻高而
造天兮又陰晦而多雨觀蘊蟲之相搏兮怵於邑汗又

交下哀人命之有當兮禍福杳其無門孰非義之可蹈
兮焉作忠而顧身余獨怪夫謇博之罹患兮親好脩而
逢殆箕子狂而悲歌兮彼比干固以菹醢觀前世誰不
然兮矧吾懷愆而造尤聊周張以嬋媛兮蓋不忍此心
之常愁涉湯陰余愴怛兮乃又瞻茲美里鄂廟屹而傍
路兮駟超軼而過止懷誠有離慙兮任道有承尤侍中
顛隕兮扁鵲被劉專惟君而邁殃兮眩吾不知其何謂
極終古而長憤兮羗炯炯其猶未昧翼繇繇之無聊兮

眇翩翩莫知所騁憂悄悄之悶瞀兮歷山川余弗省跡
有隱而難察兮物有微而先彰負蚊蟲以抗山兮固切
人之未量欲結言以自明兮拙而莫之謀也將曾舉以
遠羣兮又絳而莫之能也經溝瀆吾不悅兮亦何必爲
此行也蹇相羊以俟至今莫好脩之證也路遼遠之裔
裔兮埃風旋而簸揚煙液蒸而練練兮夕吾次于沱陽
嶺第曲以斂容兮原曖曖而塘塋風草剡而冥冥兮狼
狽號而夜鳴指黃昏以爲期兮驂駸駸又夜行曰雷霆

不可玩兮孰刑人而不戒悲轅馬之喘噓兮常十策而
九退朝攬木末之清風兮夕瞻明月指列星我既處幽
羌誰告兮魂中夜之營營欲展詩以效志兮又恐增愆
而倍尤衆聚觀而潛評兮或掩涕爲予乎淹留予朝餐
中山之初歲兮暮挈易之香莽睇北山而不見兮彼南
州又藐焉而弗予睹氣怵怵而絀結兮心緝縵而弗怡
紛流目以相觀兮見金臺之崔嵬軫雄虹之迅光兮憤
烏白與馬角燕昭既劇該輔兮厥躬亡而國削何秦嬴

之虎視兮厥二世以不祿固盈虛之環沓兮春秋奄其
代續自前代乃已然兮吾又何怨乎人心雜亂反覆豈
畢竟兮由邃古而至今重曰隆隆三伏鑠金石兮如羹
如沸行路喙兮道思作誦軫爾類兮南有喬木不可以
總兮念我徂征日顛顚兮含精內蝕世莫可說兮亂曰
已矣哉鳳鳥之不時與燕雀類兮橫海之鯨固不為螻
蟻制兮誠解三面之網吾寧溘死于道路而不悔兮

省愆賦

伊余幼好此騏驎兮服偃蹇以驕驚載銜轡而周流兮
耿既得此中路余謂秉質曷固兮謂蘭蕙介而過疑援
鳴鳩使為理兮俾高舉而並馳既倬直而不豫兮又任
怨而于條固群吠之難犯兮每阽危而弗懼余豈不知
嶢嶢者之寡完兮羌堅忍而弗懲驟諫諍以離尤兮莽
飄風之相仍交不深而易絕兮儵中道而改度媒阻絕
之不通兮焉孰導余以前路放子喟而掩涕兮逐臣去
而不還紆鬱邑以屈抑兮恐日薄於西山浮洋洋余焉

極兮濫逶移而游淫相曹梁之廢墟兮攬長河之緒風
信孔樂非我願兮望北嶺而歔歔效桃鳥以自珍兮遘
羅網之不意憐赫夏以桎梏兮雷無雲而晝鳴愍棘扉
之卑惡兮夜不見月與星吾聞湯文遭繫兮豈其博修
之故惟鄙人之不葵兮固宜蒙詬而逢怒步庭堦而遙
望兮宮殿鬱而槩天願散志之無路兮倚北戶而嬋媛
觀炎炎之焮埃兮地沮洳又蕪穢哭與哭之相聞兮對
飲食而不能下怨長日而望夜兮夜明闇又若歲蚊蠅

伺人以唐旁兮鼠登牀而鳴逝恍侘傺余隱軫兮哀民
生之多蠶數惟萬變豈其可槩兮孰泮忍而不跲援往
聖以為程兮按余志且焉止戢夢忽乎余上征兮魂浮
游之逖逖過太儀叩天閭兮捫白榆之歷歷進不入以
遑迴兮退余將覽夫下土馮玄雲以相羊兮洵極樂而
無所撫辰星以攄慮兮據雄虹而降觀飲積清之浮涼
兮依北斗而浩歎何民生之錯雜兮紛既有此多難心
猶豫而內訟兮悔有目之不見寤周覽以增歎兮塊獨

處此幽域鴟鴞萃而翔舞兮鳳鳥饑而夜食衆輟沓以
自媚兮焉誰察余之悵悵閔芳華之零落兮秋風至而
改期飈蕭颼以摧容兮天淫淫又陰雨幽屋破而下淋
兮牀一夜而十徙恹蘊倫以省故兮冀一見之不可得
日昧昧以將入兮掩衾裯而太息惜余年之彊壯兮常
坎軻而滯留憐鬢點之漸變兮恐芳草為之先秋情有
感而難忘兮性有紕而不釋念昔者之周渥兮孰堅忍
而拋擲闌紆壹以怵督兮竊陳詩以自抒懼言弱而道

阻兮恒潛隱而思慮

宣歸賦

正德九年是歲甲戌厥月辛未臣以居官無狀得
蒙寬譴罷歸迺作宣歸之賦其詞曰

昭浮清以覆育兮北斗平均而酌時
蟋蟀微細而先秋兮水知寒而流漸疾
余生之蠢持兮性重剛而習坎吾
既婢直獲斯厲兮孰復訟心於顙領
悲群志之詭異兮恒忌勝而營已
與已好則曰好兮忍惜蛾眉而攻毀
繫

聖人無小大兮吾聞大道以天下為公彼黨同以掩飾
兮繫非儔而謂忠惟古人之醜偽兮迸四夷而投北胡
今士之婪穢兮廉之則云伐德帝板板以遼寥兮九天
立而雲征洧汶汶以瀕夢兮豈察詳而悉情滂澄清厥
躬殆兮原靡豫而遭放美余焉獲茲嘉聞兮詔冠帶以
流浪晨靈雨以揚櫟兮遡江漢之浮浮背朱明之游颺
兮面長庚而北邁瞥九江余習儵兮超大別而逾迅介
夢澤以洋洋兮風沔郢以遵順宵認參昴兮晝諦波濤

痛定思痛兮癘前車而內忉衆乖滑以善憎兮噉沓喀
而背訛譎嫵嫵以朋附兮瑣刺齧而陽紿艷余惡以披
離兮矯九仞之翩翩趨溷悶以孤憂兮巢雲柯之蔽芾
彼叢噪以側眸兮含沙射而伺予夥千百以致一兮操
寤言而誰語陋嘍尹之僞態兮壽偃僂唯唯趨起生捩
直俾之曲兮民炎門礪而肉魚腴血膏以日富兮佯減
儉以豪素哀窶人之填寡兮彼醲鮮袒而號呼心與迹
既我逆兮焉飲食之遑寧憤粉飾之亂姣兮疇知余結

駟而慙膺時鏖金之冰鬚兮吏抱牒環而相勿汗簌簌
以零案兮風薄肌之瑟瑟恟潰澮以煩捫兮念偃仰之
不可得報束帶以例趨兮東眩戰而孤感徒文繡之外
彪兮內棘戟其誰知思玩慢以鑿遷兮則又懼素餐而
神災吾寧轟烈劣擻與世運兮良不忍骯骯齷齪與草
木而塵埃惟代謝之飄忽兮慨顏跖逝而黃丘究萬變
以定命兮孰長存而竟留懲夙昔以質行兮吾幸夫前
路之尚脩余指日月之顯隅兮迴巖阿而槃考徒桑若

以數蔭兮移嵩華而分島仰峯穹之嶽崧兮俯泉瀨之
磻磻穆宥助以潛處兮探理窟之英邃合性命而諗一
之兮周覽陰陽之轉圜橫宇宙以長觀兮驗妙門之玄
玄混沌及而天地覆兮堯桀泯而誰分篤述作以彊志
兮吾豈願來者之盡聞

緒寓賦

炎炎赫赫歲閏茂兮舟西驚而逆流途路艱阻渺以浩
兮邁皇天之昧幽涉襄樊而濡滯兮時寒涼而雨霖水

洶洶以震堤兮勢擊盪而崩淫龜告我以茲食匪兮望
舊鄉陷焉洪濤伊誰詒斯跋蹇兮悒慘替而中忉柏陽
日之既冬兮爰諏吉而載牽駟壯既秣余遭遘兮躋廢
城之曲齧咎品形之流易兮賦吾性乎悄急進退拂以
奔波兮名與德之不立惟騶驥置之郛間兮固羆麋之
蔑如孰成敗以律之兮彼亮飛出而誠愚既矢夫捐身
以酬知孰暇計完名而保軀昵世人之善壽兮謂吾皇
皇而求家尼聖尚有茲鄭門兮矧吾庸鄙而過頗顧鹿

山以凝眸兮壯江漢之繹繹跡與心胡之偈兮精連連
而靡憚效拙辭以閑還兮醜漢道之陵夷偉龍卧以消
息兮逢三顧而有為往者吾不及之兮來者吾靡量苟
得喪匪厥命兮曾賢智之盡庸塞周章以游志兮北風
颭戾而蕭條望原野之滌滌兮薰臭奄而並燒善蹢蹢
以奚恃兮憤壅蔽皎然莫聞辟矯情以迷浪兮戲康莊
而隱身重曰陟樊城以還顧兮極南陽之永阡氣蔚鬱
以騰攄兮星辰炯而下連慷慨者多戚兮怛循蹟而嘯

吟盼白河之蒸雲兮優中原之勁風天靈靈以翳翳兮
白日晻而西匿繫人生之幾何兮汲毀譽而縈臆

寄兒賦

正德七年秋兒枝以離思賦來獻余則作此寄焉
亦教之焉

鳥來自北兮銜章進辭開緘覽意兮閔爾峻思賦曰風
嫋嫋以先秋兮百卉改而動容時序莽其流易兮塊余
猶獨處此異江地卑濕而蕪陋兮孤張張而寡仇愜直

路之蓬蒿兮綱紀壞而不脩惟彼人之嫫巧兮謹約
以先意衆瀾倒而莫之支兮昭余志之獨異陟匡廬以
凝盼兮眺江介之孤城山合馭以迎目兮清雲曳而前
征愴荆吳之渺漫兮波水淚而交逝瞻梁豫之逖逖兮
情惝恍而濡滯日晚晚以既夕兮塵埃溘而蔽天役車
載路而班班兮覲旗旒之翩翩悲時世之艱難兮詢亂
離而爭奪兄嗟弟而殷憂兮軫汝曹之饑渴終風霾而
四流兮冬不雪至於三月春遲遲以方陽兮民背鄉而

顛越揮耒耜而介冑之兮青草錯而白骨鬱余懷以遭
迴兮紛涕零兮如霰帆彭蠡以浮游兮天地吳其方旦
齊吳榜以前艚兮聊擊汰而容與余朝歷石壁之嶢嶢
兮暮泊陽禽之渚登陞岸以遼顧兮深林黝焉杳冥虎
豹舐談以伺人兮群狐狸而晝行哀死亡而無告兮橫
屍蔽而臭野斯固易懲兮彼益復耽夫刀弩惟以暴除
暴兮斯亂與亂相尋苟威信之靡忱兮吾慮夫降叛之
詭心宵攬衣以興嘆兮步明月於中庭挹河漢之回光

兮數北斗之朗星銜飈第以驚帷兮熠燿亂而當戶華
何秋而弗零兮木何蠹而罔朽上智者先幾兮厥邦保
之未危何白日之初照兮浮雲起而翳之玉與石豈難
辨兮亦司者之罔察也鉅超軼以先銛兮胡朱之不可
奪也替煩婪以蹇劇兮步高城以散眸誦昔者之怡豫
兮內怵惕之無聊駐余馬于梁之臺兮又逍遙乎大堤
睨嵩岑之峻極兮覽長河之逶迤慨伊阻之自貽兮汝
隔離而弗覲余匪貪厥好爵兮胡飽繫而不適江洶洶

以夕變兮木葉下而海波召飛鳥以詒言兮訓爾音而
永歌歌曰詞源洞以溷濁兮時嶮艱而路危羨龍蛇之
伸屈兮傾哲賢之順時孔桴海而曾思兮伯陽西而流
沙效梅生於吳市兮願抽身而舉遐奉前德以創則兮
肇孫謀而奠家

侯軒子賦

衆躁趨以幸成兮全踰夷而競先溷動勸以徑捷兮卒
隕已而弗悛彼靜者以天動兮謂定者非我能逃恒謙

守而需抱兮懼逆時而邁尤體孔言以居易兮遵孟訓
而行法謂非俟余何求兮爰名軒而省察軒吾罔徒處
兮名吾敢襲取譬涉川而戒維楫兮聊待時乎吾容與
夫桃李不能秋以英兮桂菊春而豈華彼萬物疇不然
兮乃欲速吾謂何吾討典籍以娛日兮探性命之幽蹟
冀河清之有期兮幸曜靈茲而未夕苟積久而淹貫兮
又奚窮達崇卑之足掛臆

竹石賦

有杳者篠叢彼阿徒置得地襦以華托根靈石發生直
翕飈佛樓翠風閣長竿巉巉翼紛若截為雙簫雛鳳鳴
任心吹之靈霧生乘鸞挈友騰煙霧餐霞戲委永無慮
中虛允直性介固

空同集卷一

欽定四庫全書薈要卷一萬六千八百九十三

集部

空同集卷二

明 李夢陽 撰

賦二

送河東公賦

正德元年冬十月河東公以譴放還屬史郎中李夢陽作賦送焉賦曰

飄蕭瑟以感烈兮屬孟月之慄嚴霜淒清以紛下兮風薄

戶而竅吟余戒玄武使先導兮飭冥子俾抗旌虬蜿蜒以
服輿兮第長雲而遂征三台仄以疎闊兮北斗揭而望余
颺肅泠以滂戾兮涉江漢之清渚悼喉舌厥之厲兮攬少
微而效光咎南箕之靡懲兮猶翕吐而簸張朝余發于星
之墟兮暮弭節乎冀之野谿谷捌以復陸兮草木落而茫
莽獸驚人之跼竄兮禽枯桑而鳴號雪霰晦而零灑兮氣
泠泠之寥寥車輪困而不前兮心已逝而中留驂頓纓而
蹶躓兮僕夫涕而長吁惟先生之貞嫠兮幼崇方而嗜脩

則英賢之遺履兮志皐伊而願仇蹠泰階以承列兮奉鈞
陳而布耀酌元氣而執之兮冀容光之必照倚閭闔以徘徊
兮憤漢臣嘗請乎刀壯埋輪之義力兮潛掩涕而憾遭
惟封豕之崙崙兮彼舍問夫螻蟻豺狼縱之當遠兮奈衆
臻而終靡幾不密固害成兮予良痛乎陳竇之患斬蛇弗
斷將自及兮誰將虎鬚而竟安曾閤仡仡之巖巖兮浮雲
蔽而四舉玄螭九首螭蜒垂涎兮守門嘻嘻而目余進既
無以自明兮濟弗知其退之所營紛構誹以錫訕兮謂余

亟之而亂程吾豈不知詭遇者易獲乎誠嬖奚之攸恥同
者就而異者儆兮孰孤持而弗三褫策鴈行以前路兮背
陰朔之塞疆馬騰攄以龍奮兮望山西之夕陽毅昌燕而
卒逃兮叔向飛語而拘繆荷白日之曲照兮迺茲焉反余
初服大行吟之迤邐兮岳壤廬而起伏踐桑乾之唯凌
兮冒涿霧之綽約爰十步而九顧兮九門漸而造天霓
連蜷以上驤兮爛躔緯之錯連軫紫庭之多麗兮冠珮
者至三千人步微風之珊珊娥眉入室女斯妬兮厥亦

世之故也寵移者訾必加兮矧吾皓首之怒也企降覽
之中反兮又鮮妣為余之容思伊昔之來暨兮內崩剝
而自訟沿易濱以彳亍兮泝金臺兮邈遰嘒於期之皎
節兮鄙荆氏之沉志謂圖窮而事至今冀戡贊而必擒
謀之人成之天兮竟隕首而劇心哀壯士之不還兮躡
殘壘而逍遙野曠曠之千里兮寒風唳而蕭蕭天剡剡
以梟宰兮日翳翳而荒涼薄林壑之慘閭兮拂隆冰之
積霜聆顏鵠以怵慄兮惛崛岉之荒助川蕩搏之赤赤

兮鼪狸窟而嘈聒精汜濫之佚佚兮駟遲遲而懈怠召
豐隆翊余蓋兮喝飛廉而疾馳揚溥沱之文舂兮驟井
陘而單騎偉左車之雄視兮嗤陳餘之偏意張生既收
厥綬兮趙由之其邦以喪陳子獵于南皮兮漢龍興而
虎翔惟休咎係之數兮大風起而潰圍苟增老不之疑
兮豈張韓之獲為彼荏苒固膠合兮孰鯁直而罔殆展
氏介而三黜兮遽瑗奔而再危踰壽徐以橫目兮快并
州之舊鄉亘墟曲之莢亂兮采茹蘆於汾旁霍岳岳以

迎幟兮桂樹偃蹇而俟余狎斑豹于曲際兮釣淪淵之
秀魚準歲功以消息兮御陰陽以卷舒追赤松以授要
兮從巫咸而卜居亂曰明明日月奠天維兮太陰四塞
孰將夷兮陟彼寥谷望河漢兮上無舟梁眇淡漫兮嗟
我寡翼安能厲兮顧瞻北斗中心惓惓兮校兮憯兮聊以
卒歲兮

弔申徒狄賦

申徒狄諫紂不聽乃負石沉河而死

覽洪河之吐噏兮洶欲濟而無杭物有離而不回兮勢
有激而難當劇厥人之抗行兮羌自沉而弗疑恬齎志
以長畢兮庶聞者其猶悟之彌六合以設弋兮鸞鳥騰
而不反蛟龍沕以避害兮惟恐去之弗遠不吾知其亦
已兮何荃之忽焉而莫斯睹監四方以求索兮孰聘美
而釋女曰辟汶汶以淆濁兮班予馬莫之適也衆披離
以障之兮又入而莫之白也進惴惴余瞿遽兮固不若
死之為安寧負石以葬河魚之腹孰忍利菑而盤桓竭

誠信以諫君兮反罪過又謂欺惟堅僻之類忠兮任飛
廉而不疑余固知佞媚之能周兮磬秉質莫之移也介
塊處而無營兮又衆人之所咤也既謂干為忠兮胡又
附雷開與惡來既曰切人微兮曷不委曲而導之悲時
俗之顛倒兮先生獨遭遇乎此時燕雀烏鵲噪堂堦兮
鸞鳳出而見縻曩余知材朴之為崇兮迺彊而不謂之
信然苟作善降之祥兮彼梅伯又何以顛捐規矩以改
錯兮斯固時之態也荃既與彭咸齊名兮亦何必怨此

害也鬱終古其侘傺兮瞽悒悒之不可平循隋岸以邇
迴兮戒舸船余怵營汴河流以投辭兮氣紆結而填臆
慨往后之迷誤兮社稷顛而用屋重曰昔有大夫曰申
徒兮懷瑾弗展負石投河兮冤抑內憤靈汎濫兮湍瀨
礚礚愁人心兮忠回倒植固庸態兮嗚呼先生女又何
懃兮伯夷子胥與爾為類兮

弔康王城賦

趙宋高宗為康王築此以拒金人

隴側桑以歆根兮飈沙慘日而瀾漫勢斷屬而連天兮
寒蓬卷而翩翩覽靈波之汪洋兮惋九河之善崩臨決
口思前往兮尋北原之故營塹莽沒不可見兮莽千里
兮繁蒿旋風四起埃飛蔽日兮鴈失群之嘈嘈怒豈鬱
余顧懷兮夕駐馬乎河之渚想張韓之旆旆兮望朱僊
之雄壘嗚呼哀哉兮山陵委棄江介是都登佞黜良兮
社稷丘墟宮殿瓦礫兮二聖為俘嗟嗟彼何密而茲何
仇復執迷而弗悟兮汚分疆而取憂

弔于廟賦

正統己巳之變少保公有社稷之功

棟宇頽折兮四顧無垣
鵠雀鳴噪兮雪壅其門
風衝激以拂帷兮慘九州之肅泠
軒長河以飲景兮飛光至而舒靈
何先生遭不造兮定危邦而永存
用才者終固鮮兮孰震滿而完身
顧瞻宋京兮追念雙帝組頸為虜兮
單馬北逝虎臣視而誰何兮英雄竄而蓬蒿有憤壅蔽而發疽兮亦有垂成而反被劉嗚呼先生成敗難以逆

度禍福不可豫謀死苟足以利於國兮洵蓋臨而焉求

弔鸚鵡洲賦

承帝皇之嘉惠兮荷在陋而明揚信枯楊而再華兮懼
身微而命彰歲協洽以南騫兮觸炎日之盛陽浮江漢
以長邁兮過夏口之故城洲蹇產以隍隍兮劃衝江而
絕流觀佳名而中惕兮弔斯人之不脩我既佩明月與
寶璐何不遂凌世而高步舍玉駟而不駕兮又奚暇與
豺狼而爭路惟聖人之貴時兮神龍豈人得而縻彼鸞

鳳之謂瑞兮固亦以其高舉而見希何先生之靈鑄兮
獨不深藏而遠游也徧取方以捐育兮吾恐睿者之所
尤也繫炎鼎之既淪兮世清濁而崩改操梟視而虎噬
兮祖又貪夫厥土荃縱不甘心於厥儔兮獨不可色斯
舉也嶢嶢者將必缺兮余固知仇者之不與也矯吾權
以淹留兮情覽望而增傷靈惝恍而如見兮聆湍瀨之
浪浪山壘壘以來合兮孤墳鬱而嵒嶂誦英篇以沉顧
兮痛翠禽之蚤戕物有以舌羈縛兮人有以才隕身譬

用機各攸當兮恨見幾之不先心屈怫以悵悵兮翳營
營之不可留沛揚櫟以東進兮順武昌而下舟溯巖岼
以却視兮投哀些於斯洲

哀郢賦

崔嶽崎以旁靡兮困京顏之崢嶸隍壘齟而莽沒夕飈
勃興沓兮閭閻水鳴叫而巖斬靚教墳之嵒嵒兮羅莊
王之登檢泊石城以盱眙兮望江陵而涕流壯洞庭之
淼晶兮繫江漢之玄洲掩陳蔡之弱郢兮控荆揚而上

游俯灘瀨之淺淺兮傷楚平之破丘伍員奔吳兮屈生
浮湘懷行罔返兮厥民用喪蘭臺肆侈兮玉差進淫陽
春消歇兮黃鳥沾襟陵井塌而狐穴俾人哀而迄今

沅彭蠡賦

正德六年夏五月李子赴官江西南道彭蠡之湖
作賦曰

仲夏惔惔兮湖水洶湧戒舸舟而逆進兮志定意恐朝
發湖口兮巉石纜牽搶帆午張兮陵急洋而縱船洪澇

吞吐兮杳莫界際
淡漫瀆洗神精搖兮浪起伏而來曳
曩余誦夏紀與酈經兮識彭蠡而心慕翳厥水集流夥
兮挾十川而北注合岷江東之為東江兮脇揚吳而
騰海包敷淺而潄之兮撼匡廬而使改惟據巨者附斯
衆兮滿之者驟必溢彼何怪弗之潛兮抑何摧而靡殛
射者萬鼓之千兮叢谿壑之湊趨澎靈崩以箭疾兮勢
嶽頽而電舒匯莫究始兮散孰察其終龍蛇逐之何載
兮至今窟而以宮析之錫嘏兮侮之擬昔怒之風雷愉

之霽兮亦厥靈之攸逞潮乍客以飢關兮條當晝而忽
陰上下既顛置兮孰又辨昕昏與北南睇衆山之劒攢
兮爭負高而竟降關膏麓之淤澱兮奄焉墊而爲江緣
木末而巢室兮民浮居而舳艫悼隻雛之寒嘯兮寂岷
濱而守衆亂左蠡之沸沸兮壯康郎之浩汙濤沃日而
明暗兮巒島潛而渙散瀾已俛而復昂兮渦湓潏而接
連瀧無風以橫飛兮潭澄渟而布漣龍夭矯以戲瀨兮
粵舂汎而吹沫芄薌沕之昧昧兮魚鱉貫而鱗鱗具區

洞庭方余不暇兮懼九圍混而黝冥苟清濁軋其瀕瀕
兮聖愚一而泯靈胡弱草丹而華兮反泓棲而矜彩鳧
芘龍鬚兮蘆葦蓂繁其被汀兮紛振翰而雲駭彼陽鳥
既逝兮鵲鵠嘻而專已鷖水馬以闕扉兮蛤又濡珠而
曝殼詭殊錯以跳踉兮有曲牙而鹿其角既逆鱗而返
舌兮復殞首而象鼻汙針尾而戟鬚兮族翫翫乎濇濇
誰非含生而願遂睹彊柔之闔濟兮唾陽侯之懦怠縱
鯀鼉之恣肆兮甘失職而蔓災虞坤漏而陸沉兮鯨一

嘆而三泣蜮吸飈而排砂兮時負渚而人立濺雨迸而
冠岫兮岸衝樅而壑落詫妖譎之多態兮魄撼促而心
愕瞬兮異覲恍兮變索究之諒奚以兮聊戢櫟而遊淫
夕景掣以波下兮石鐘礚礚而竅吟追三苗之即敘兮
亶文命之訖敷彼九江未之殿兮余誠憂鬼類之貽呼
迺橈人之罔諳兮祠九晉而丐邪愚者吾靡疵兮鄙明
賢之用頗景神姦之勤算兮數歷鉉誰弗竟危魍魎支
析倔彊伺間兮倫臨湖而嘯悲

觀瀑布賦

空炎陽以北邁兮遡敷原之上疆
遵嶽南而遐陟兮廓晴流而志揚
日旒旒以景旗兮嶰崎嶇乎微行
峰吞吐而迓余兮嵐裊翕而颺路
超歸宗以翹盼兮覲開先之瀑布
諗前記而髣髴之兮眩飛空之孤形
誦銀河之逸句兮精陟天而九征
挾巖潭以上氣兮接神漢而並垂
積雲左右以傳彩兮霞表裏而秀姿
沫霏霏之晝霧兮崕丹翠滌而蕤蕤
光金黛而亘霄兮浩呼洶之湧湧
龍

朝帝以潮從兮虹為梁之總總韡若華以西曜兮東扶
木兮倚明星辰涵而布錯兮岳瀆影之其中絢練恍惚
百怪潛兮勢明晦而無恒晷之若住忽奔噴兮石雷壑
而驟崩經香鑪以熨紫兮破雙劍而冰攢踰黃巖以珠
迸兮籠玉殿而金煙濯炎女之玄髮兮苔離根而永生
掛洞宮之幕幕兮隱芝箭而懷情沸混混之爛爛兮飈
瑟馭而涼風泉滾滾而安竭兮孰尋源而卒窮必劃割
以繚紛兮渥華巔而分派水簾谷簾亞之揚兮靈終古

而并戴巍歟嶺而上行兮疑質違而性非蒙井厥流常
兮譬鉞顛而血隨吞日月以膏顏兮震雲氛之翼翼江
海巨而昏墊兮哀趨卑而罔直體融陰而內陽兮準坎
離而向背嚴不蓄類迺澤物兮醜彭蠡之汪濊浮朱鳥
之寒景兮爭龍騰而攄掣擊高者韻斯宏兮谷哨啄而
坤圻赫翩翩以倏眴兮小鴈蕩而不眦露霜霾而離離
兮處遼域而孰知怒哮牢以思逞兮石岵嶂之惻惻晴
電追之霆突兮信駭觀而搖臆猿纍纍以竊窺兮倚石

鏡而呶嘯燭焯灼耀的皦皎兮類至人之懸照肝颯達
徠兮荆太始而留耀歌曰造龍池而印之兮究瀑布之
肇踪巔湧而壑射兮誠神靈之攸鍾轟過惑而遐瞋兮
壯二儀而永效磨鬼怪避鑑鑒兮微瀑孰以察逝者之
高妙伊動者必定兮潭窅沕而淵峯礫之灝而寧之清
兮厥金水之共質亂曰相彼山泉潄淙澶漩勾谿朋漣
洵遵科以造海竟隨流而泯瀾覩厥瀑之靈詭反群詫
而背誹吾苟耆天地以遺聲跡亦奚暇校高下與狐疑

泊雲夢賦

將起野豬之湖風西而阻乙丙丁戊兌颶颶颶
餘轉迅問之老人曰此南陽之風也厥陰始生應
諸少陰之方

幼余紛以好覽兮懷長風而浪濤夏匯液之浩浩兮阻
雲夢之逆颶東南紀之攸墊兮包荆衡之衆山貫江漢
以爲絡兮勢朝宗而播瀾翼潛沱之翩翩兮掖景陵之
嵯原吞沔鄂之曾隰兮洸逶迤而炭漉坻峴峴兮掩翳

橫余前兮蒹葭紛而蔽天月重陰以繁雨兮駭厥鵬爲
之先鳴邁大別以悠泝兮邁少陰姑而用情次大澤之
巖陞兮睇風雲之上征惟彼斗酌而靡均兮縱柔金以
噓吸孤心昏以徒爛兮趨西流之避及覽萬情之翻覆
兮爰背坎而向離指朝宗以辨位兮定星辰而訊期極
明晦之變態兮盡洋滂之淫淫倚聆牕以凝睇兮數周
圍之峻岑勤伯禹之土又坤維奠而至今情瀆滉以無
依兮聊唁昔而周章慨五湖之見幾兮詠孺音於滄浪

胡洞庭之險整兮三苗區而蕪滅舳艫蔽江以來下兮
孰攘攘而非衣食往者既不可追兮吾寧俟時而矯心
擬陽濬之文貝兮采芳芷於漢潯龍擾余以負艎兮珠
夜游而光吐憑烈性之難抑兮淚浪浪隕而思古誦曰
昔有郊郢厥惟楚都實邊雲夢百雉其郭何材弗殖寶
玉明錯魚鱉麋鹿於物訐訐麋麋甫甫齒革毛角有茜
有堊各以類積礪礪岳岳服食之屬苧臬絲葛甘鹽苦
酢靈餌珍藥觝弩勁薜犀甲狼毒王府克溢宮室棺槨

商旅沓至貿遷繹繹漁牧諧足鳴琴巷哭國以富彊鞭撻晉秦挾鄭狩獵出入二數旌旗千里戈船璘玢金銀璦璫倏眴忽閃獸柴鳥墜追者稱善後王何道游關靡返懷沙奮辭邦墟憐惋

漢濱賦

余過解佩灘憶交甫遇女之事於心感焉作漢濱賦

夫何二女之頡頏麗兮遵蘭皋而並翔順微風以鸞顧曳

文桂而交揚躡雲鬱之華履皎羅襪以雙步凌漢潭之
漭波掇瑤草於芳露態婉孌以窈窕情同嬉而中乖起
灼灼以齊赴忽含顰而怨偕眉疑低而復伸脣欲啓而
羞面嗟巧笑以回瞬目盈盈而流盼翩兮驚鴻恍若裊
電仰西方之纖月悵邂逅於嘉夕足將移以躑躅魂已
逝而聿役忤多露於蔓草矩漢廣之貞游戒有祭之奔
密慕娥英於湘流揮柔袂以掩涕寄朋素於明璫效鷄
鳴之贈珮厲霜心於鮫光倏潛耀以莫覲撫衝飈而懷

形睇征雲以西迅裊飄芬而淚零面三星以申詠痗朝
陽於首疾伊綢繆之幸諒詎穀焉而同室

空同集卷二

欽定四庫全書薈要卷一萬六千八百九十四

集部

空同集卷三

明 李夢陽 撰

賦三

放龜賦

畜有二龜李坪驛俯長江之流目發育之溶溶怛
然有傷於二物復思趙抃放龜事千載同懷爰放
二龜於江潭已作斯賦比興諸義聊抒鬱志非諷

一而勸百者擬也喻兒子亦作

精網縕以游魂兮各含和而構形何茲物之詭異兮獨
神超而蘊靈準麟鳳之隱見兮呼吸陰陽而卷舒善伸
縮以遠患兮匹神龍而水居嘆賦命之多蹇兮遇且網
而見執蒙君子之珍視兮戒航舟而並畜仁人細弗棄
兮廼伊欽余之素貞曰雕龍豈林游若兮爰偉賢哲而
用情譬機羈之願脫兮慮曳尾及而遲暮俯洪波以余
縱兮瞪長江而徑步歌曰醜混混以流形兮孰厥龜而

副嘉外負介以昭武兮內文柔而靜遐體穹窿以則乾
兮履坤方而祛慝鄙饕餮之諛世兮寧吞浮而飲息沐
澄泠以棲寂兮戢潭荷而保身文於列以布象兮色蒼
古而玢璘景至人之赴義兮將刳中以効誠怨穆卜之
靡諧兮懼捐軀而莫明賡歌曰江滔滔以東下兮兼葭
莽而波濤幸已縻而終逝兮劃順泛而長逃念曩昔以
中惕兮數惟拘縱之所殊思范楫以依徙兮願附孔而
海桴鳥故林以悲鳴兮獸蹢躅於前丘軫宿蔡以迴逵

兮躍澠溟而涕流亂曰聖欽元龜戒朶頤兮十朋四靈
榮以時兮淵潛罔沕出斯縻兮求仁見夢厥無惑兮劓
腸灼螭爰奚益兮謚兮龐兮齊天地徜徉兮

大復山賦

夫大復山者荆徼之名山淮實出焉淮過桐栢始著
於是禹道淮桐栢始淮山二精發於何生產諸申陽
何生於是自稱大復子實非遺淮要有攸先焉爾余
珍其人爰造斯賦不煩諦瑣義意畢矣然辭猥調

通知音君子諒有譏焉或曰此山胎簪亦其名云

噫吁戲厥山峻崛岉兮填鴻龐而導九川爾其巖巖隗隗崆嶲魏蹙增崙重萃合沓蔽日曲勃焉安連巉巉而
棧棧迺有危峯七十輒岵岳岳嶠嶠岵岵松柏蒙焉千
里望之蠶蜒飛飛兮若鬪龍之附於天也頽而察之萬
山駢戢劍森戟攢爛若湧蓮下則無底之谷呬坤維而
曳玄淵昔盤古氏作茲焉用宅是以濁清判三紀揭瀕
洞開明劃日月厥山既形餘乃發故爾上冠星精下首

地絡聚膏以為崇滲津以成川竅若浮肺萬谷漚旋神
瀑湧焉飛流崩嵯走壑蹴石噴雪釘鐘礧砰鏗鉤迅霆
擊虹震于太空若其勢磅礴逆折狀若胎簪高首殿其
北荆沔包其南右標熊耳之嶺左朝桐栢之山其陰則
凝冰積雪晦明倏忽翠篠丹澤其陽遊飈吸歛重黎攸
宮東有日華之林陽榮之風西則涼霏素露淒淒清清
珠樹粲英若爾材林浮雲寶藏蕃興騰氣簸氛至其觸
膚寸而起也櫪櫪乎波駭山靡不終朝而天下雨也於

是生人立禽獸伏草木殖靈芝秀宮闕醴泉噴其側於
上則神鵠威鳳翱翔吸甘華百鳥從之振翰若雲中有
玄熊綠羆騶虞游麟猿猱麋麇百千為羣樵採牧獵之
子唱歌出林響振峽谷咸蹶躡迸逸不見踪跡於下則
長淮發源配天迪坤混混汙汙江河並尊受珪上帝疏
穢錫存乃有祈靈丐禧梯航而來沉玉瘞壁闔塞路達
若爾幽崑之栖真兮三三兩兩御飈轂抗霓旌左控白
鹿右翳紫莖燎兮若將逝邈延立迴風淹留兮攀林薄

逍遙兮山中於是稱曰春草兮萋萋思公子兮傷悲若
處叢篁兮終幽險虎豹暮咆兮蛇虺舐舐公子兮歸來
雲冥冥兮石瀨潺潺

河中書院賦

鄉人呂氏以諫官謫蒲蒲故有廟娥眉側祠太山
也呂至移文廢焉曰山川之神祭不踰境非鬼而
祭孔門諂之某職叨佐邦靡敢弗經也以問其守
守曰敢不惟程問之校校官若士曰程敢不承察

諸民民翕翕欣若有興也於是廢其廟稱書院焉
而祠有虞氏於內曰蒲舜都也配以夷齊從以王
薛左之名宦右之鄉賢量宇聚徒區田祀養考鐘
伐鼓視履迪業李子聞之曰善哉呂氏知教本矣
夫驅邪以端拔怪以常伐慝以昭破淫以義是故
君子之於邦也不患不從而患弗躬躬義布昭敷
常表端以是而教鮮不率矣何也四者其本也然
又斷之以獨協之以同行之以勇迺奚往不濟矣

夫淫祠罔福故鍾巫禍隱神降亡號往鑒具燭然
河投娶婦祠毀妬女世每罕聞何也怯者怵于利
害疑者沮于異同庸者安于習俗才者憚於改革
故曰非勇何行非同何助非斷何成三者既獲四
本迺立然後經定程堅教斯興矣是故君子不爭
而醜莫不同不煩而衆莫不從標立而影隨近聲
而遠應凡以是爾李子曰余為呂作賦將以凡音
摘調泛絃流管俾大者歌小者哦觀者米焉陳之

太師爰知蒲政賦曰

帝炎氏之蟬聯兮厥岳四而布分龍九川以蘊根兮中
敷葉而竟芬翊華蓋以陟降兮遘白日之既夕忿撓槍
以抗言兮帝乃怒而遐斥攬余轡以周游兮登蛾眉而
縱觀睇巍廟而增歎兮愾下淫而上殘曰巘巘魯所瞻
兮喀胡為乎蒲之壤非其鬼而祭之諂兮曾謂泰山不
如林放惟時俗之詭譎兮恒造怪而亂真日隱求以饒
福兮徂惑羣而誤民宇巘嶸以嶽立兮巖廊翼而雲構

既竊號以據要兮復創形以之鑄鏤內泥直而樗惡兮
外猙獰而儼嚴冒衣冠而土食兮燃朱楹而繡簾龍蚴
蟉以梁騰兮獸夾隅兮躩跼鈴荅臘以簷鳴兮幢繡紛
而旖旎執命柄以消息兮握陰陽而運樞怒之雷霆悅
春陽兮役鬼神與豹羆生吾生而死吾死兮謂苦樂死
而遽殊苦桎梏以僂僂兮樂羽葆而輶輿衆駭心以搖
目兮伊誰辯渠之假真民溷溷以朋從兮憧情迷而喪
身蹇予于以攬涕兮哀斯人之無知軫聖者之故都兮

蓬蒿鞠而徑岐山四雲以波湧兮日晚晚而就沉河洶
洶以趨下兮松栢暮而風吟班余馬以北首兮望九天
而魂征招飛虬駟而上訴兮閭闔闕而晝局余回駕以
東指兮薄日觀而聊憇願釋誣以祛穢兮岱謝余以弗
哲沛蒼野以遼邁兮即重華而跼蹐靈總總以騰陟兮
爛北逝而後先臨舊京以邐延兮倏若去而中留颺拂
巘以明滅兮右涉瀨而夷猶埽除兮蕩滌清宮兮供張
風泠泠兮八牖神陸離兮果降羅桂漿兮椒食琴瑟作

兮鏘佩玉恍彷彿兮莫親工祝告我兮顯則曰俗不可
戶說道不可塗求端物者端已治人者自修二氣推盪
禍福倚伏時罔常泰日中乃是王革以義霸救以力巡
守廢歇明堂載黜爾乃七十二君封禪侈矜玉符金檢
顛崖是登夫習沿於襲勢積於成昭縮以獨愚淪以朋
踰分之祀匪今則承立經序妄言諄志勤爰惟政本氓
哉爾欣

朱槿賦

司陽兮燭烈涉秋兮逾熾覽逝兮中蘊游物兮揄志
庭木之榮麗閔含芳之不脩傾朝曦以擢華夕景至而
隕枯伊賦形之靡移諒天道而奚私幸見標於哲典厥
登詠於刪詩何有性而易遷恒隨所而盤據條荏苒而
孔弱葉縈陰而繁布蒙薰風之拂披爰脩妍而運縟既
抽鉛以剖絳遂希芬而效馥濡溥露以膏韻藉垂光於
杲日熨炎陽之靜彩褰絕代之英質態疑層而遽損媚
若歛而復出光飄灼而靡定恍若流霞過茂草爛若慶

雲遊春沼宛變窈窕
牽縈縹緲或爾托文堂之隙寓奉
君子之榮輝側朱陞以敷蔭競葵榴於赤墀屈纖枝於
皓腕徵瓠齒而清歌歎形微而寵重屢回笑而增酖天
暮日夕顏銷華落辭高墊卑飄蕪汎濁撫塵池緯撲簾
續幙或委空曲或飛土苴馳叢迴波蹂踏坐隅觴停鐙
昏主倦客煩烏履無序折釵碎鈿几席狼籍命駕歸旋
於是棄勝擯嬌愁女怨姬出幽房步苔階搖金局吟殿
月掩團扇而涕零徒長門而望闕攀斯木以凝盼掇實

萼而中熟足將進而踟躕立長廊之肅陰軫蘭臺而首
疾咎增城而痛襟思愴怳以攢內泗交頸而淫淫嗟容
色之難恃慨懽懽而異營佩薰芳以順委庶生榮而沒
寧

感音賦

夕杪春之嘉月美桃李之芳陰躡飛陞之微霜仰天漢
之橫參切逸弄而駭顧識六孔之流音起於綠波之濱
翔乎綺旒之林芊繇乎縹緲放肆而繽紛激櫺軒過行

雲遶迴風以中絕鬱哽咽而斷續詳乍浮而乍沉度情
回而思曲積憤迅發金鐵齊鳴壯士怒而髮豎若石裂
而崩驚逐臣歎而子孤子呻而竊憐爰抑節以徐訴
信悠怨而誰宣類慕仇之隻禽悵山危而海深離虬舞
而不持嫠婦啼而夜吟託黃鐘以根奏旋少陰而寂寥
衆淹泣而不忍精慘慟而魂銷思躡跡以寄懽軫天路
之昏邈苟浮雲之足攀願假翼而申約誦春陽以增歆
懷冲調而鍼心情氤氲以中結神恍惚而外姪外姪兮

躑躅若臨水兮將別遵大路以翱翔
揜垂條而采折期布志於情親懼馨香之易歇
詠落梅以自明幸傾筐之在挈
誠蘭質之見珍畢余身以長訣

噫賦

人秉陰陽皮毛肺兮六淫相薄風斯噫兮彼我牽念噫
亦至今靈往精徙固以類兮逐臣兮江濱放子兮辭疆
思鬱抑兮內結嚴飈慘而肌傷懃懷沙於夕風履中野
之晨霜涕噴迅而染鼻洩交頸而浪浪疾有幸而甘心

情有離而中還歎終風以踟躕爰託聲於願言步巖殿
之蕪苔曳迴飈而影旋幸回光而一噫倘顧笑而申懽
痛革絲兮衆進懼黃裳而永捐

鳴鶴應鐘賦

惟懸金之奏響或宣晨而報夕既朋趨以典列爰計畧
而旋服何茲禽之抱慧矯圓吭而振羽驪回飈以衍衍
跂浮雲而望翥應昕昏以引唳暢幽積于清吟衆喧闐
以畢日孰詳忱而撫音步踈樾以延志歷堂陰而俛啄

怨情遐而跡凡恐霜儀之永濁豈余居之未擇諒時命之靡齊悵玄圃以孤逝匹文鸞而接飛

觀禁中落葉賦

颺溲戾以寥肅兮廊宇靜而蕭條覽宮木之隕零兮哀貴賤而並凋辭珍柯而永絕兮邁回風而吹舉撼金鋪以撼颯兮排紫闥而求侶為長颺之所接兮條激響於青雲襲日月之末耀兮攢玉階而委身譬賤士之利賔効琛贄而熙載離鄉土而遠適心縈思而搖旆忽兮若

聚儵兮分散儻碩果之見知即姜離其何惋

惡鳥賦

厥何區之最醜爰賦形而不淑毛拳跼而頸豎秉陰陽
之奸濁體癰腫而截瓠惟鉤喙而鬼目誠昏瞶而妖穢
枉氣化而生育恒聞聲而罕見畏衆鳥之追捕懼杲日
之融顯羗宵征而晝伏棲託軀於惡榦浴刷羽於汙流
嗟錫腐之是飽棘墓門而巢幽既寒炎而罔識詎孝友
之能服羣磔母而始習雌同卵而求匹昧懽嘉之美音

乃前凶而豫稷集何方而不惡鳴吉違而承吝君子獲
而外咎小人遭而中鑠恃詭秘而靡覲愈騰驕而翔虐
上帝握令神明予奪豈曰不知庇此沴族無因獲災賢
弗有祥過遺之音夜誰可防周鴛哀訴賈鵬歎傷帝曰
人命有初禍福不爽禽得氣先終豈女戕

鵲賦

有翩翩之珍鳥東陽剛而含哲擇喬榦而託處信于飛
而頽頽性靈達而好靜恒相時而豫移知多風之害患

則從巢於下枝善傳祥而遞音類明士之幾悟遠林巖
之遐闌遊庭松而棲寓虞增弋之見尋於君子乎是依
飲九霄之曙露啄嘉實之離離黃鐘厥月天地閉藏雪
霰紛其交下烈風嚴而雨霜羣植寥乎未拆諸動潛于
深密羨斯鳥之前覺獨銜槁而營室窪象天體方則地
矩義備晦明智敵風雨諳擊衝之玄括背太歲而啓戶
諒綢繆之軫心點拮据而誰語嘒春陽之未臨聊俟時
而共嬉感主人之隆篤戒彈矢而罔欺步玉除以俛啄

微風跂而自閒冀融景以驤躍昂清雲而拂旋激神化
以耀德逢印赦而幻遷庶遺安於衆鳩順天命而自然

螺杯賦

左叅議屠君宴客出螺杯焉天然厥形精瑩異常
屠君曰螺江物也得諸漁人托之以金可注可飲
稱杯焉右使黃公見之喜不自勝黃素於酒溢於
是則連飲數螺螺迴酒不輒醕也黃使仰脣傾務
盡之許詩贈螺李子作賦賦曰

何物詭形旋尾敞口厥腹彭亨藏深廣受若仰復翹匪
方匪圓珠姿瑩澈質脆精堅五色文錯素浮擅焉扣之
金聲玉避其溫含華結液海鱗疊紋苔潤浸積幽光吐
吞昔嬉大洋今佐貴尊違彼龍窟媚我綺席枯殼不捐
主人優渥鑠金靡熱墮指罔裂天然逞殊焉雕焉斲凝
如竅壁映猶飄雪公輸無所指其巧王爾祇自慚其拙
烏履雜遝堆腥蹂鮮瑤爵登几飛觥肆筵醲不及寫揮
竿呶誼螺於其時傾之不齟頓之靡安心焦意煩宜瓶

壘所笑而觴解居前也才會俊集風榭月夕崇潔進高
揮鏤擯琢蚪彼黃流螺以壽客目悅情愛悟義推德納
洪舉輕類有餘今飲不輒罄藏若愚今屢傾屢至來徐
徐今非藉弗安相厥處今外瑩內虛以授為容今旋形
錯彩潛友龍今吸月之華奴蚶蚌今翔于潏溟瑞由江
兮委身君子俟時庸兮

貢禽賦

異乎翩哉黃旗南來海奇越珍鳴舞伊軋戲船續紘毛

羽絢爛走飛繻繻美妙極臻步止異常巨細情態駭人
鳥則秦吉了畫眉山鵲五色鸚鵡番鷄孔雀綠鳩火鳩
白鷗紅搗猿則金絲通臂猱狖獼猴小大什伍有朱喙
丹距玄體白趾絳冠翠衿黼黻相倚蒼黃文錯頸繡練
尾紺目巖額金花鐵鬚旋如雪迴並猶錦聚詭質慧心
巧舌人語清若笙簧睨睨滑瀏爾其選山澤設長羅搜
妍迹捕流影購工懸賞效獻思逞祖禡皆作劇閑齊警
萬人波逐千騎林騁下無跼獸上無康翮十百獲一地

搖天反於是飾雕籠裝寶絡戒虞官慎水食有山林之
所未有食人之所未食而乃辭島邦別瘴隅道蒼梧逾
番禺入江湖歷荆徐艱難萬里達于京都域有濕燥氣
有涼炎春行秋至溫不敵嚴毛顛尾鍛鮮落瘁添經城
吏懼邁野民憂幸其過速歛錢而賕至則昂天軒觀豪
門振紫庭浴漢潭美葵宮坊殿縱上林葵者如浮縱者
若沈味不升俎毛革不御此何物者而蒙是榮遇拔微
登賤永棄風土於是歌曰聖王卻珍禽獸靡哉貴賢崇

德麟遊鳳儀役神遐異厥民之厲白狼以歸荒服不至

水車賦

厥甃有輪一側一覆覆者旋左側承以屬各有犬牙錯
銜摩軋象彼兩儀環周樞幹有百具肩牽聯承乘必噓
斯降有挈乃升成功者退四序之旨行息棘紓於厥輪
視噓者受一受者在中長槽引之無寫弗通受曰含弘
通曰流形默濡旁溉支洄源淳其動也時其靜也虛一
砥操之與造化競驅夫其惟水車乎

四友亭賦

夫物有情契事有偶同人大觀氣有流通故一本而視同體之義存焉體物著用因心之懿宣焉命友以四倫數之天天定物合事之奇也闡名設亭訓之推也故埴篚之音暢於家而後孝弟之風行於國何則敦薄銷鄙非久弗著也故詩曰和樂且湛久莫要於不變不變莫如松竹梅栢人友其一而亭其間而盤而桓所謂事同情契可以大觀

者歟矧吾一氣也乾父坤母物不吾異也哉於是賦之賦曰

繫許氏之為亭也左崇嶺右大江架旰豁軒紛龐占巨域符名邦上納嶺岼下壓濤瀧屹鐵城之東圻割勾吳之西封圍之以金焦之秀標之以芝山之峯爾其經始也召班爾謀詹咸諦璇歷證虎鈴伐直材於太古之谷礱文石於千仞之巔慎陶鍛而兼美雖鏤雕而務堅既測圭以定景復銓辰而考躔信抱形以回勢亦負阜而

面川則大壯以弘義乃取乎上棟下宇法三才而樹本
故使之下方上圓懼室閉之傷順則以之四洞八達惡
巧麗之賊久斯尚夫樸厚渾全孤立乎曠濶之圃俯瞰
乎薦繇之阡而乃藻常棣而為梁糝紫荊而為牆雜之
以蘭夷椒桂繪之以玉碧文章苞忠厚以為基準虛明
而開窓仰穹窿而體健俛靜直而效方遵扁啓於昕暮
式向背於陰陽於是則徙嶰谷之梢運徂徠之幹拔新
甫之奇挺收孤山之芳翫水潤火煦義培仁灌冲和融

結寒暑變換倏華歛實俄聚乍散玉琤雲鬱素飄蒼爛
或偃蹇牖戶或昂藏霄漢或巍若大夫或瘠若君子或
如幽岵綠裳翁或如空谷白駒士或岳岳而立或娟娟
而倚判體合蘊殊狀詭形輪囷離奇剝削娉婷望之溟
濛就之矜嶢日為之視風為之聽雨為之沐雷為之醒
煙為之韻神為之冥茲四物者非所謂天下之至靈歟
而奚萃吾亭也迺有蘭昆玉季鴈行雙雙攀勁拊脩振
英掇穠人取其一稱為四友乃於是召上客呼戚儔敞

翠帶羅珍羞膾江鮮剥吳牛進楚舞徵齊謳飛兕觥列
清壺益之越錯侑之海腴解帶傾庶羞促節紛高倡絙
伐木之亂簧闥牆之章欽友于之嘉懿悲衆布之見戕
調瑟琴於既具沸塤箎之遺響已而樂希顏酤主賓共
起徘徊於四靈之下衍遊於葱蒨之傍吸霜柯之明雪
飲蒼玉之浮涼拾香鈴以藝鼎採寒葩而泛觴掣懸茗
於上枝散啁雀於叢芳避松徑以行丹鶴護竹實而需
鳳皇於是各命侍兒遞節緩歌出飲入趨絲肉相和松

兒歌曰若有人兮佩鳴環修蒼髯兮抗冰顏抗冰顏兮
吾之友心莫逆兮萬斯壽竹兒賡之曰有美一人其脩
如玉翩翩翠袖日暮空谷暮空谷兮憺忘歸居有朋兮
我心怡梅兒賡曰子醜妍兮華我惡於子游兮元之素
元素本無垢歲寒願相守柏兒賡曰冠我我劒陸離綠
髮毵毵褐歲庭歲庭靡時改中路莫疑悔歌畢主人乃
還客入亭復坐引觥而各不自覺其頽然醉矣客則強
起婆娑舞其歌斷續弗調似亦賡前歌也歌曰吳江落

楓洞庭下橘朔風有嚴玄冥變律露露溟溟慘兮而慄
龍蛇以蟄百卉蕭瑟堅者隕榮脆者銷質是時也不有
此四友者於斯亭也孰與壯天地而光月日哉

冬遊賦

仲月之交役車既休草木變落水涸不流於時駕車命
侶辭閨涉防泝長阡以橫目眇煙藪之蒼蒼零露下而
草濕清霜飛而柏傷浮雲翼其四起高鳥止而復翔詫
途隅之鴻構忽危榭而重樓破千金以營域錮九泉而

為丘歎狐鼠之無忌覽榛棘而懷憂爰息輪以陟崇眺
城觀之霏藹日陰陰以向暝雲肅肅而歸海念皇衢之
如砥懼前路之中改冀蓄陽以發春準四節而成載

空同集卷三



總校官庶吉士臣侍朝

校對官庶吉士臣陳崇本

謄錄監生臣王詔